

太原衛生調査班

修業第五号

昭和十三年三月一日

様  
八  
七

汾州府志卷之十五

人物三

山西省圖書館藏

(24370)

01015

辛彥博汾州人初名彥德洪武中貢入太學高皇帝賜  
今名旋授監察御史秩滿遷浙江按察使以誑誤左  
復除監察御史尋擢都察院左僉都御史改詹事府  
事上書忤旨降山東按察使以保舉違例再降雲南  
政司叅政遷浙江按察使永樂初以擅責寧波衛指揮  
陳仲禮謫戍興州未幾召還復除監察御史補福建布  
政司右叅議伴送瓜哇使臣赴行在帝顧謂廷臣曰此  
先帝所嘗器重者即授浙江左布政使賜鈔五十錠因

山西省圖書館藏  
地方文獻

乞省墳墓得旨歸後卒於官彥博居官四十年持守  
清正不營田宅及喪歸子孫貧甚鄉人言爲官清苦者  
必以彥博爲稱首

李鳳臯平遙縣人洪武中舉賢良方正知榆社縣有政  
聲

梁卞介休縣人洪武十三年由通經儒士授本縣訓導  
施教有方尤諳治體辛彥博器之薦擢御史病卒

張俱平遙縣人洪武丙子舉人性端嚴言動不苟初除  
磁州判官以廉能著擢左春坊司直郎侍皇太子讀書  
朝夕勸導以聲色寶玩最易喪志上聞賜荆杖勞之未

幾謝事去後屢行徵辟卒不起

曹輿介休縣人永樂辛卯進士授行人博通諸史名重  
當時以病歸止騎一驢行李蕭然

武允介休縣人永樂丁酉舉人通明五經博覽羣籍恒  
以啟迪後進爲心歷寧遠盧龍二縣教諭所至有聲士  
多被成就尋乞致仕鄉後學翕然宗之

王潤介休縣人宣德乙卯進士知威縣有善政祀威縣  
名宦

柴莊汾州人宣德末知金縣廉正愛民秩滿百姓保留  
增俸復知縣事

楊昇字伯起寧鄉縣人正統戊午舉人官彰德府訓導  
遷遼東教授有學行在官在鄉俱多所成就

董瑾字文玉介休縣人正統十三年以貢生爲陝西甘  
州中護衛經歷性剛直有廉操時有貴宦滕蛟妹以不  
孝詞投瑾瑾不少恕御史李某受屬於蛟轉屬瑾不聽  
卒置之法

王約寧鄉縣人正統中知定州善撫民時官軍逐寇糧  
芻不給設法厝置事濟而民不擾擢浙江鹽運同知

楊智介休縣人少喪父三年中未嘗見其喜笑母喪哀  
毀廬墓有白兔馴擾人謂孝風所致正統中旌其門

武琦介休縣人景泰庚午舉人少居母喪廬墓時有穢  
軍作亂琦守墓不避賊入其廬見書數卷外無長物曰  
孝子也去之後官陝西肅府審理正

任義平遙縣人景泰庚午舉人篤於孝執喪廬墓三年  
知真寧鞏二縣以清正愛民稱民立遺愛碑

龐輔寧鄉縣人景泰丙子舉人成化十四年知涇陽縣  
改三原縣有異政擢知階州輔持行清約致仕歸鄉黨  
重之三原縣祀名宦

李穎平遙縣人天順己卯舉人授兗州府通判清介自  
持祈禱輒應民作清泉詩以歌之祭酒王雲鳳服其廉

謂有太古風

董齡汾州人天順甲申進士選翰林院庶吉士歷河南按察司簽事四川按察司副使所至有廉能聲子文奎以舉人知玉田縣有父風

武賢字尚德孝義縣人性至孝母失明以舌舐之遂復明父母俱歿稍遠出必拜告墓自墓還倒行不見墓始已聞官司傳呼聲雖暗室亦拱立竢之後舉入太學天順中知元氏縣有訟者反覆理論之不加刑民皆相勸以訟爲耻庭清無事改知興平縣亦如元氏去任之日皆老弱泣送

李頤平遙縣人用志誠篤孝聞鄉閭成化乙酉舉人官鞏昌府通判歲饑勸富戶出粟以賑全活甚衆暇日課農桑教民務本考績以寬廉著民立碑建祠凡二十餘處後遷溫州府同知

李秀汾州人成化戊子舉人知樂安縣清廉有異政發奸摘伏如神在官七月而卒樂安民祠祀之

溫廉字志潔介休縣人成化戊子舉人詮選第一授山東濟南府同知招撫流離奏除民害九年遷知尋甸州轉知澂江府時土賊猖獗莫能勦捕廉至殲其巨魁餘悉解散廉以禮匡俗政聲大著澂江學校公署傾圮皆

廉所修舉卒於官士民悲泣。

周儀孝義縣人成化辛卯舉人正德中官鄆縣教諭與諸生約鷄鳴就學課誦書史儀未雞鳴卽起正衣冠以待諸生多所成就秩滿轉保定府教授篤於訓迪一如鄆縣時。

馬驥介休縣人成化甲午舉人知寶坻縣臨事果斷不阿貴幸縣多皇莊草魚等廠中貴權倖時騷擾爲害驥請咨兵部出榜通行禁革一時頌聲徧滿道路。

文瑞介休縣人成化乙未進士授行人出使唐沈二府遺以金帛却不受擢監察御史按畿甸時有中貴侵民田前經理官得罪瑞按法平之併直經理者之寃權倖悚然巡山東官舍有妖暗投瓦礫中傷人瑞至妖滅值亢旱出祈禱卽雨降人咸異之後擢山東按察副使兵備遼陽節操愈勵卒於官囊箚蕭然。

車梁石州人成化中爲御史十五年條列時政中言東廠錦衣衛所獲盜先嚴刑具成案然後送法司法司不敢平反請自今徑送法司毋先刑訊章下未報主東廠者言梁從父郎中霆先以罪爲東廠所發挾私妄言遂下詔獄給事御史等乃獲釋遷知漢陽府卒於官。

車霆石州人成化辛三進士官刑部主事歷至郎中霆

性慤直持已廉正與上官語是非無少回互出知平涼府吏胥奉法唯謹藩府宗室無敢以私干者蒞任八年遷陝西參政入爲苑馬寺正卿擢右僉都御史巡撫宣府修舉邊政實心有功績致仕歸以禮讓表俗

張翼介休縣人成化甲辰進士授刑部主事歷至郎中出知保寧府遷四川按察副使羌人屢肆劫掠督兵勦除悉讐伏又遷貴州湖廣參政擢右僉都御史巡撫甘肅殫心區畫獲功十有六次西北賴之尋召入理院事未幾請告歸卒翼性耿介其居官清望最著

王錫石州人成化丙午舉人官洛川教諭性篤孝父輔歿於山東扶柩而歸野宿不避雨雪旣葬廬墓三年時早霜殺禾坐左右獨不傷咸以爲孝感所致服闋補曹縣母喪亦如之斷絕菜鹽形瘁骨立知州王道一再往請之歸謝曰死犖前足矣竟卒

任良才平遙縣人成化丁未進士知江陰縣擢知高郵州良才性孝至老不衰居官以清介稱

田籽汾州人宏治乙酉舉人知長清縣居官鯁直二介不取其事親孝養誠至及親歿廬於墓所哀思骨立嘗有早霜殺禾獨近地禾不傷人以爲孝感之應族人多化之鄉黨推重爲立忠孝祠與辛彥博並祀

賈璇汾州人宏治庚戌進士官戶部主事歷員外郎中  
嘗督鈔揚州羨餘歸之官行賑江北調度有方所全  
活甚衆正德初守闕乞誅宦官劉瑾等不報出補陝西  
右參議未幾爲瑾所陷而歸及瑾伏誅朝廷將欲大用  
以目疾辭時論惜之

高崇熙石州人宏治庚戌進士官至四川巡撫蔭世襲  
錦衣衛千戶其事蹟湮失考正德六年二月諭都察院  
右副都御史高崇熙劾有云今保寧江津等處殘賊復  
聚爲患爾會同總兵官楊宏征勦藍五等餘黨同副總  
兵王憲勦殺江津強賊朕念彼處地方四年用兵軍民

困憊已極爾須加意撫恤設法賑濟存問疾苦寬釋脅  
從十年八月贈右都御史高崇熙誥有云事有定論乃  
追念其前功故都察院御史高崇熙器識恢宏性資莊  
重累遷臬府才猷振乎綱紀兩擢藩司政克宣夫德化  
以蜀寇之未寧致王師之見討乃從僉議晉陟中丞彰  
國典以勵人心飭兵機而鼓士氣羣方漸息藹歌頌之  
將興三捷交馳丕風聲之益振顧其推誠待物竭力保  
民豈期釜內之魂復有柙中之變雖勢難再振而功未  
全收爰召北還遂致中殞十一年四月諭祭文有云爾  
性資敏達器宇魁梧發跡賢科擢司風紀歷官藩臬綽



着能聲晉佐都臺在撫西蜀時因盜起受命臨戎捷報  
既聞賊氛復熾事出不意遂致人言方在申誣胡遽淪  
沒觀此則崇熙累官及功績大概可見第崇明官長垣  
縣丞擢知邱縣亦有治績

石瓚介休縣人宏治壬子舉人知羅山縣時霸州流賊  
猖獗鄰縣棄城走寄印於瓚者十一瓚孤城獨守鏖戰  
月餘面中矢自拔去殺賊有功兵部奏請陞俸一級仍  
管縣事招集流民撫恤備至知府出見羅山民呼而語  
之曰汝等天堂上百姓邪擢萊州府通判維山民立生  
祠瓚以親老乞歸侍養遂不復仕方伯劉回可移檄嘉

之曰孤城獨守功活萬人巡按尙維持表其坊曰光生  
冀北名著汝南帶管提學楊肩賢以忠臣第題其居

任良弼平遙縣人良才之弟宏治癸丑進士選翰林院  
庶吉士授刑科左給事中轉吏科都給事中彈劾不避  
權貴遷通政司左叅議忤宦官劉瑾降補建昌府通判  
復矯詔下獄謫戍遼陽持節自如瑾誅起通政司右叅  
議良弼居官三十年澹泊如諸生名重朝野及歿家惟

琴書

辛文淵字道深石州人宏治癸丑進士知濬縣丁母憂  
服闋補固安縣遷知無爲州轉河間府同知忤宦官劉

瑾逮獄謫廣東化州同知未幾遷河南汝寧府尋致仕  
以御史薦起彰德府時山東盜賊縱橫而登萊間尤甚  
乃以文淵知萊州府至則浚隍崇墉以忠義激勸其民  
而忌文淵者方據要津或勸以饋遺免禍文淵不從復  
棄官歸文淵性剛直所至有聲

嚴泰汾州人宏治丙辰進士官戶部主事峻潔有治才  
不妄取予督鈔蘇州蔬食飲水而已鈔關故有便民小  
閘後并徵稅泰至罷之吳人謠曰澣墅灘頭無濁水蘇  
州關上有青天後知登州府考治行廉平第一以介直  
忤時或有造飛語欲中之者泰歎曰是尙可仕邪卽抗  
疏歸杜門罕交接服母喪終身不除

張禮石州人宏治丙辰進士知博興縣祀鄉賢事實無  
可考

辛桂石州人宏治甲子舉人知寶豐縣遷永平府同知  
誥封戶部郎中祀鄉賢事實無可考

劉仲原字宗本汾州人宏治中歲貢生母喪廬墓晝夜  
悲號有盜夜半乞火仲原與之其盜知爲孝子廬遂感  
化改行卒爲善類牧童樵夫皆識其墓呼曰孝子墳

劉尙忠汾州人正德丁卯舉人知合水縣縣僻事簡尙  
忠靜厚不擾蒞政五年晝日清閒有白鳥常集於庭擢

平涼府通判

張鍵字君重石州人正德戊辰進士官南京戶部主事忤太監劉瑾逮至京師不爲屈謫衛輝府通判瑾誅復戶部主事督儲天津流寇奄至鍵登陴誓衆晝夜不息卒保無虞薊州莊田累經奏贖不決鍵履畝清覈歸其侵於民督餉關西招商搜逋士無饑色會蘭州大饑死者枕籍鍵發粟賑之全活甚衆及歸蘭州民遮泣立石志思擢知開封府開封中州省治隸縣四十餘文移旁午揮洒如流凡事之不便於民者必釐革之未幾卒賈繼之汾州人璣之子正德甲戌進士官戶部主事歷

至郎中寬厚廉謹有儀度未第時省父揚州有遺千金求通關節者不納便告歸父曰旣來定省何遽歸邪曰恐在此多事或負大人清訓耳後以言大禮被杖明年卒

張鈞石州人父赦國子生以二親早亡矢志不仕隱居城北村鈞正德己卯舉人以親老亦不仕讀書奉養孝聞遠近嘉靖二十年俺荅兵入寇虜其父去追百餘里號哭不絕寇射中其肩拔去復馳至則父死已二日一痛而絕及甦斂父屍歸盡舐父血水漿不入口三日不勝悲痛而卒事聞建孝烈坊旌之

馮華石州人正德己卯舉人知鄆城縣祀鄉賢事實無  
可考

張襄敏珩石州人正德辛巳進士授監察御史巡鹽兩  
淮繼按畿輔及陝西所至貞憲釐弊獎廉絀貪時稱名  
御史歷太僕大理二寺少卿僉都御史巡撫延綏尋遷  
南京都察院右副都御史提督操江未幾召入協理院  
事進左副都御史會宣大總督罷廷議屬珩珩以鄉曲  
辭爲言者所指落職久之以原職起巡撫寧夏進兵部  
左侍郎兼右僉都御史總督陝西三邊前後獲首功甚  
衆上數賜璽書金幣勞之進右都御史居數歲拜戶部

尚書督理大倉未至值延綏有警坐失事被逮謫戍慶  
陽未幾復起爲副都御史巡撫延綏遷前職丁母憂歸  
卒於家年七十餘賜祭葬贈工部尚書謚襄敏珩行履  
修潔器識宏遠居官以剛介著前後上鹽法馬政邊畧  
二十七疏尤博綜羣籍爲御史時輔臣有謂珩才行可  
充講官者欲推轂入翰林珩三疏不就時論高之  
任道敏字濟愚孝義縣人正德中知漳縣至則撫瘡痕  
招流亡平土寇不二年縣大治以疾歸道敏性孝友居  
官在鄉皆有聲稱

張大祿字萬鍾孝義縣人正德中歲薦爲國子生官深

澤縣丞有廉操事父母以孝聞

賈越石州人正德中知汧陽縣清正有特操遇事立決會縣境盜起越往勦遂戰死

李秉彝石州人嘉靖癸未進士知蠡縣祀鄉賢事實無可考

胡汝輔石州人嘉靖乙酉舉人知安東縣除強禁暴蒞政剛方改商河縣擢監察御史上時政十二事皆切中利弊轉按察司副使

高金石州人嘉靖丙戌進士歷兵科給事中九年上疏言陛下臨御之初盡斥法王國師佛子近又斥姚廣孝

配享臣每嘆大聖人作爲千古莫及乃有真人邵元節者誤蒙殊恩爲聖德累夫元節一道流耳有勞僂以金帛足矣乃加崇秩復賜其師李德晟贈祭廣孝不可配享於太廟則二人益不可拜寵於聖廟望削元節真人號并奪得晟恩卹庶異端闢正道昌上方欲受長生術立下詔獄拷掠終以其言直釋之尋偕御史唐愈賢稽覈御用監財物劾奉御李興等侵蝕狀寘諸獄時有牛氏者恃國戚橫肆金以法治之不少貸帝聞曰此天下直臣朕所畏憚又除京師巨豪張孝後遷山東按察司副使政聲大著北直山東俱入名宦

嚴霜臨縣人嘉靖八年知襄城縣性溫和簡約以儲蓄爲急遇雨暘祈禱如響而操持廉潔終始如一

張九湖石州人嘉靖九年寧鄉縣妖人聚衆五百出入寇掠九湖願爲國除賊時官軍甚少九湖充義勇能挽六石硬弓其發矢賊卽應弦而倒乃悉來皆殊死戰官軍不支奔潰九湖猶力拒矢盡遂死之年甫十有八

雷潔平遙縣人嘉靖辛卯舉人知延長縣居官九載有美政潔平易近人優禮士子尤喜崇獎節孝

張冕字服周孝義縣人嘉靖壬辰進士授戶部主事監收太倉轉本部員外郎擢河南僉事分巡大梁至洧川

因颶風辨野寺之冤人咸異之遷霸州兵備副使平土寇其居官勵操守及歸行李蕭然居家二十年博極羣書德行文學遠近推重著有勝溪文集及縣志

賈銳石州人性篤孝家貧幼孤事母竭力致養遠近皆稱曰賈孝子嘉靖十一年知州李昇額表其門禮請鄉飲力辭不赴母卒年九十八銳亦六十七矣哀毀廬墓遂卒於墓所

李翰字憲夫汾州人嘉靖甲午舉人知高陵縣存心平易遇事練達值地震人民死者過半盜賊蜂起翰立法甚嚴懲治渠魁不少狗民賴以安擢慶陽府同知

劉尚義汾州人嘉靖乙未進士由行人選御史在朝稜稜有威望降秦州判官改知朝邑縣遷松江同知俱以清介稱擢南京刑部郎中出補四川僉事兵備西蜀兼督松茂邊餉蜀人苦空運尚義設法收給軍民兩便又釐清宿弊民作八頌以歌美之轉陝西叅議河南副使卒於官家無餘蓄尚義爲人淳朴簡淡好讀書所著有相山集四卷詩五言尤駁駁入古

張玘石州人嘉靖乙未進士知清豐縣擢兵部主事歷至郎中出知永平府先是夢二朱衣人遺墨二笏至是謁夷齊廟所見宛如夢蒞任三年勵清操擢按察使晉右僉都御史巡撫順天屢奏首功尋謫布政司叅議復入爲大理寺少卿遷順天府府尹轉南京戶部右侍郎召爲兵部右侍郎中途疾作至延津卒縣令發其行裝止俸銀十有七兩士論以爲仰孤竹遺風者賜祭葬如例廕一子

張德化石州人嘉靖庚子舉人孝友篤行博學洽聞不仕而卒著述甚多門人私謚貞孝先生

韓道兒臨縣人嘉靖十九年俺荅兵入境掠其母道兒追及之以石擊賊母脫歸而道兒被殺年甫十有七事聞得旌從祀鄉賢

張丞相石州人少孤及長爲諸生事母以孝聞嘉靖二十年俺荅犯石州母被執奔救俱被殺寇退人往視之其屍尚抱母之頭有司申請立孝烈碑是時殺掠甚慘石州爲親死者十有一人

于溥石州人二歲而孤奉母盡孝年十八讀書城中嘉靖二十年俺荅兵抵城下號歸求母母已被執道遇之取石擊寇寇就剖其心而死母得遁去事聞旌表

張永安石州掾吏嘉靖二十年父爲俺荅兵所逐持挺追之擊傷二賊父得逸去而身自後衛之被數十創死事聞旌表

楊經寧鄉縣廩生嘉靖十九年俺荅兵入寇其父被殺經率二子淑湘提鐵棍重四十斤結河南力士王邦直時人號之曰王千斤者俟間深踐寇地殺獲首虜還謁軍門凡歷三年餘軍門送歸本縣肄業知縣旌以額曰忠孝天成

霍冀字堯封孝義縣人嘉靖甲辰進士授永平府推官擢監察御史清軍浙江巡按河南平土賊師尙擢大理寺寺丞都察院僉都御史巡撫寧夏戎事甚飭賜金綺移鎮保定畿右歲祲嚴武備發倉廩民賴全活蘇昌宣大以缺餉告命徧歷疆場盡得耗蠹侵冒之實因條上



恤軍通商轉輸財賦制可尋命總理山東河務轉  
兵部侍郎總督三邊軍務厚恤死事汰儲將不職者募  
丁壯激忠義修戰守具軍容一新時延寧兩鎮皆有奇  
捷晉兵部尙書料天下戎馬強弱邊塞要害及諸將帥  
材勇高下悉經畧劑量之宜以議憲臣功罪及京營事  
宜兩忤輔臣乞歸冀歷官三十年持已接物溫恭端重  
而才力過人事至轉化無滯年六十卒賜卹典如例  
陳謨寧鄉縣人嘉靖丙午舉人初任知縣歷官戶部郎  
中性謹厚廉潔動履不苟執父母喪廬墓六年兄訓歲  
貢生家庭以孝友稱並爲士論所重

梁明翰字維憲孝義縣人嘉靖丁未進士授刑部主事  
歷至郎中知慶陽府遷按察司副使邊陲騷動撫降其  
衆轉太僕寺卿陝西叅政遷四川按察使明翰性長厚  
賑恤鄉黨與人交恂恂禮法居官平易近人年八十三  
卒

張芹字獻之孝義縣人嘉靖丁未進士觀政解餉雲中  
愆期左授山東布政司照磨權知肥城縣遷安期縣招  
集流移民多復業改濟源縣擢戶部主事轉郎中知延  
安府有惠政民爲建生祠

劉有誠字存甫寧鄉縣人明嘉靖丙辰進士官行人司

行人轉司副正四十二年遷刑部江西司郎中讞獄多所平反隆慶二年起服除刑部陝西司郎中竊徒李朝等爲亂勢猖獗有誠廉得其狀畫策擒渠魁數人平之明年授浙江按察司副使會歲饑請於巡撫賑恤二十餘州縣賴以全活勅臨清兵備尋督學陝西擢山東布政司叅政分守海右藩王奪取民田以爲莊田歷年已久有誠理而歸之民礦賊嘯聚爲變有誠鎮靜以消之時青境凶荒流離殫心招撫設法輕減徭賦手校簿書至寢食俱廢得病告歸半載撫按促之起入境民如見慈父母值漕渠淤塞開新河有誠與贊籌務求所以寬民力前病復作卒於官病劇時諄諄如夢中語猶以東人困役爲念有誠性嚴毅自其少好濂洛諸儒之書有所感動則錄出粘壁間爲學首嚴義利置紀過簿慎獨牌以自警嘗慕明道文清志行諸葛文山忠貞居官勤於民事所至除積弊之病民者及卒囊無長物僚屬捐俸助衣衾巡撫以下咸感其廉操厚恤其嗣萊人建祠勒碑著有詩文語錄數十卷子士宏爲諸生天性孝篤早失母晝夜爲孺子泣事祖母晨昏定省躬自炊爨父疾篤衣不解帶及歿毀幾殆撫諸弟友愛里黨共稱其行

王緝汾州人嘉靖己未進士授吉安府推官以母老迎養不便疏請就近改助教歷職方司郎中擢太僕寺少卿轉僉都御史巡撫貴州苗民歸附賜金幣進副都御史巡撫南贛終戶部右侍郎歷官三十餘年兩爲巡撫尤多建樹貴州建祠祀焉所著書有防邊紀畧

趙訥字孟敏孝義縣人嘉靖己未進士知定興縣賑饑有法改江都縣時權貴欲以其縣稅糧洒派鄰縣訥不從擢刑部主事服闋補戶部差管徐州倉出羨餘修呂梁洪橋轉郎中知保寧府甫三月乞歸囊橐蕭然訥性儉約不治家人生產嗜讀書寒暑不輟教人以孝友爲

先實行副之刻語錄詩文三十卷雜著選次七十八種郡縣續志其一也年七十九卒門人私謚文直先生王友賢寧鄉縣人嘉靖己未進士歷知長安曲周二縣擢湖廣道監察御史遷大理寺丞轉少卿歷光祿太常大理寺卿工部侍郎南京戶部尙書加一品俸卒贈太子少保友賢雅度抑抑而深沉有執持在朝不阿權要其行事無遺文可考

薛東海石州人嘉靖壬戌進士知滑縣守官剛方嗜學至老不倦生平多所著述

張更化汾州人嘉靖乙丑進士授南陽府推官隆慶三

年擢監察御史。嘉靖中，陞南嶺。萬曆元年，巡鹽政。按鳳陽三年，南畿道制卷。晉以整飭者五年，擢陝西副使。遷參政。丁憂服闋，補湖廣參政。十四年，遷山東按察使。丁母憂，復補原任。十九年，遷右布政使。歷河南、左布政使。二十一年，晉階太僕寺卿。致仕。更化，歷官所在有聲。性端嚴，鄉人胥敬之。有祠祀在城東關子。熾以孝行稱。朱表櫻，慶成府奉國將軍。嘉靖中，俺荅入寇，表櫻赴闕獻策，忤嚴嵩意，以越職言事，斥之歸。後寇圍汾陽，慶成王知其能，與畫策登城守。出奇計擊賊，賴以保全。表櫻精韜畧，所著有陣圖、撞石飛礮、滾標、戰車、懸樓等式。或言表櫻嘗得異術，臨陣祭大蜂，蔽天入敵營，蜚死甚衆。故解汾州之圍。

田賦，孝義縣人。嘉靖中，肄業太學。賦七歲喪父，慟毀骨立。母病，跣步不離額。天請代，以憂瘁髮盡白。與弟佃至友愛，因思母不置，遂成病卒。鄉人稱之爲田夫子。

趙師商，孝義縣人。嘉靖中貢生。官清苑縣主簿，執法不撓。條論時政，多見採納。尋歸，其居官在鄉，事有濟於人，知無弗爲。祀清苑縣名宦。

高崧，寧鄉縣人。隆慶丁卯舉人。初任知縣，歷官真定府通判。居官清正，惟恐不義涉躬。

文揚孝義縣廩生隆慶元年俺荅兵入其里肆殺掠揚  
避走出舍尋其父知被執往救乞代不得遂並見殺  
孫士亭臨縣人俺荅入寇扶父避入崖谷一賊追及之  
士亭以所持鏃與鬪擊賊走入營中羣賊持弓矢射士  
亭中二十七箭死父得免有司上其事立坊旌表  
張格石州諸生負母避難遇賊將刃其母哀泣求代不  
得罵賊而死

張中路孫光裕車成並石州諸生俺荅入寇與州民張  
邦化李正秋崔桂劉朝瑚守城死祀州北忠烈祠

陳王道寧鄉縣人萬歷壬午舉人知延川縣改清澗理  
冤獄判決如流咸得其情而廉潔自持循聲大著擢真  
定府同知

王政字正之孝義縣人萬歷癸未進士初知宜陽縣獄  
獄稱平改清苑縣裁冗費撫流亡不阿權貴擢刑部主  
事督漕運清剔漕弊性鯁直其行事不少假借

范道行字太衢平遙縣人九歲能文善詩歌萬歷癸卯  
舉人知澠池縣立學校重農桑民感其德爲立生祠以  
宦官魏忠賢索賄不應被劾歸子自成之亂罵賊死

梁殿邦字元鎮平遙縣人萬歷丙午舉人知三水縣少  
孤嫡母閻氏母曹氏殿邦有至性事母曲盡孝誠負異

才爲文與古文行並爲世所重

喬承詔字揚名介休縣人萬歷庚戌進士知南宮縣擢按察御史按閩平海寇地方寧謐以薦舉與當事不合歸杜門著書崇正中召起爲太僕寺少卿催餉陝西憫其民貧憊疏奏寬減憂勞得疾卒於行署從祀鄉賢給子孫奉祀生員

董承業字紹休介休縣人萬歷癸丑進士官中書歷刑科兵科給事中因陳時事忤宦官魏忠賢被劾免官杜門著書及魏璫敗召起太常寺少卿感痿痺疾告歸卒於家舊介休民多以輸粟於邊湯產承業適奉差至大同言於巡撫得改折色民永便之

王四維永寧州人萬歷戊午舉人知邵陽縣甫下車值歲饑斗米錢千二百立請蠲賑設施有法全活甚衆擢衛輝府同知監軍餉畫謀擒叛總兵劉超以功擢異王文清永寧州人萬歷己未進士累官都察院右副都御史巡撫遵化等處清介端方朝野倚重致仕歸父維機贈奉政大夫刑部郎中祀鄉賢事實無可考

任尚智孝義縣人萬歷中貢生知三河縣以不媚權要致政歸鄉黨咸重其清操

王裕心字元涵孝義縣人政之子天啟壬戌進士官南

京國子監博士疏訟楊漣寃陳魏忠賢罪惡狀留中不報轉戶部郎歷大名寧夏蘭州榆林道皆有政績擢右僉都御史巡撫西安數立軍功致仕歸值李自成之亂不食死

馬初登字揚衡介休縣人天啟甲子舉人博閱羣書尤精心於易時流寇猖獗初登設法守禦城賴以全

李開先汾陽人天啟丁卯舉人有善行鄉人多德之祀鄉賢

李英俊介休縣人父天質狂疾投井英俊時方灌園奔救不及隨投井中俱死天啟中有司旌其門

趙宗堯平遙縣諸生父歿三年人未嘗見其喜笑與弟宗武事母盡孝道崇正中知縣于爾直桑開皆旌以額生平周恤親族多善行

胡選春字統三汾陽人少孤家貧崇正戊辰進士知聊城縣詢縣中利病知其最苦者歲報大戶乞徵解水陸道舳軒絡繹破編民產十八九選春乃建議設吏代之以贖錢備器用諸有賄累則出於官而供張亦咸辦壬申河大浸選春左右指畫疏洩之必退而後已水既退艱播種復請免額稅未幾僉知臨清州值孔有德兵屯州境遇春率州兵以守時出不備襲擊敵始逸大學士

朱延禧聊城人也有傑奴犯陰罪匿相府遇春必捕之  
正以法指揮德州滿某狎一倡婦窺倡多金盜攫去倡  
恚死倡弟訟之滿賂當道屬誣倡弟坐死遇春爲直之  
曰不以賤抑其冤其戒子書曰汝父半生半死人斷不  
作貪墨吏爲若輩牛馬切勿學豪華兒姘鄉閭敗吾志  
蒞政六年擢戶部主事以病歸抱病五六年卒於家子  
庭字季子李自成之亂庭遂與弟同並隱居講學庭於  
易詩春秋論語大學中庸孟子皆有論著同精明醫學  
四川總督某請治篤疾至則愈且敬其爲人遂深交屬  
員有以三千金致饋求同一言者峻拒之兄弟共勵名  
節有學守

劉三元字聚奎平遙縣人崇正庚午舉人性方嚴負節  
概初知欒城縣教民稼織俾無曠土無惰民擢兵部車  
駕司主事兼戶部事出爲寧遠道會李自成之亂三元  
與諸生范羽可等糾集各路義師至數十萬及事無可  
爲遂棄家爲黃冠放浪山水間後遊欒城舊治士民張  
樂伐鼓方於生祠爲賽會三元徑入祠踞坐取爵暢飲  
衆環視識之曰吾父母也羅拜痛哭後卒於欒城  
李元滋石樓縣諸生謹厚有學崇正五年李自成之亂  
賊執之罵不絕口以死有司旌之曰義士



曹良直字古遺汾陽縣人崇正丁丑進士知尉氏縣歷  
知靈壽雄縣擢兵科給事中條奏兵形八事一軍令不  
可輕更兵機進止呼吸變化此行間事也若樞臣調度  
惟宜斷之以大義如近者督師薊督領兵前進威必宜  
揚侯國必宜救此大義也忽而以尾追無益議撤忽而  
以東西分入催戰在廟堂之上不過一轉語耳而三軍  
之衆倏進倏退幾等兒戲且進退之間勞逸生死判焉  
必有心志搖搖怨聲載道者言之可畏以後請痛戒之  
一闕外不許請旨將在外君命有所不受況陛下神謨  
廣遠屢有原不中制不許遙請之明旨近來將帥故違  
頻瀆習以爲常此不過騙陛下旨以爲卸罪地耳且  
請旨疏入而營謀安頓之伎倆種種隨之矣此奸弊之  
尤也卽或無他而兵機呼吸立變彼馳奏候旨部覆又  
候旨往返等待之間事機已去矣陛下徒勞批答樞臣  
徒費申飭無益也以後凡有遙請者比逗遛科罪一入  
援不許請旨臣子赴君父之難義惟一往更無轉念近  
來庸懦撫鎮旣聞邊警疏請入援明係逗遛觀望其中  
布置安排且不可測也此豈復有人臣禮乎除如遼楚  
秦豫身臨大敵原應請旨外其餘皆屬不臣後有犯者  
立逮正法一援兵不許報號樞臣一聞邊警調取各路

援兵文內必有赴某軍前聽調度之辭此卽信地此卽軍令也近見各援兵至必先赴京兵部報號雖覲面遇敵亦不戰曰我未報號也軍法離信者誅違令者誅獨不一問乎夫援兵違至聖恩必有賞犒臣謂如調兵文內係來京者就京城外賞犒之若調兵文內派有某軍前者宜將賞犒發至軍前違限後至者竟免卽報號必不可廢亦止許數人入都違者以枉道逗遛論罪一監軍不許敘功將帥皆在功罪之中惟恐欺飾而後設監軍焉若一體敘功扶同之弊必滋故監軍止許事後敘勞卽論功罪亦宜以精核爲功通同爲罪若戰勝獲功不許列名違者以冒功置罪如是則監軍脫然於功罪之外必無通同欺飾之弊矣巡按亦然宜著爲令一監軍不許鈔將帥之塘報將帥在功罪之中塘報大半欺飾監軍者宜自領一旅專視各將功罪臚列塘報刻期密奏其於將帥塘報許從公駁正并奏如有通同掩飾別有奏聞監軍重罰不赦一戰守之功不宜并敘行間欺飾之弊最多如將帥欲飾罪必先報功而又恐人發覺乃并地方官亦敘在內甚有敘及巡按并鄉紳過客者或云措餉設犒或云添兵助器或云指授方畧此無他蓋欲人人有功之中而無異辭以遂已之欺飾也以

後列名者以冒功論罪庶將帥之欺飾少止一舉將連坐之法宜有分別聖明之世豈乏禦侮之材而人每每知而不舉者惟連坐是懼然而連坐可不行歟亦曰稍爲分別可耳如督撫鎮將除一籌莫展以及大貪大詐連坐不宥外其餘清勤勇烈而爲時勢窮困者姑免連坐若所舉之人生平可諒忽變而爲貪詐其舉主能自參者亦與免罪良直少甚貧族人中有欲助之貲爲治生計者謝曰吾輩豈逐末營利邪及歷三縣所至有政聲去之日民泣送者盈道性嫉惡在朝彈劾不避權貴以直聲著卒於官

田芳孝義縣人崇正丁丑進士歷官陝西河南提督江西學政擢太常寺正卿以廉正著所至有政績

朱新堞明宗家汾陽縣崇正十四年由宗貢生知中部縣時縣殘民困繪流民圖將上之會公事出土寇陷城免官已而復任命下賊破潼關已五日矣毅然曰此吾致命之秋也受事未旬日賊傳檄至新堞方巡城怒而碎之立斬來使欲效死守而縣新破人皆逃散乃書表封印使人馳送京師具冠帶望闕拜又望拜其母卽自經士民葬之社壇側妻盧氏妾薛氏馮氏見新堞誓死以待賊至請先縊以盡節新堞撫而勉之左右皆泣士

民亦以耐葬

傅作楫孝義縣人崇正癸未進士知慶都縣歸後事父母二十餘年有孝行國朝順治六年姜瓖之亂迫脅不從逃入山中及賊平大將軍手諭招之作楫至營以老疾固辭入城見尸橫道中悉爲掩埋收養逃亡男婦凡百餘人遣之歸家所著書有銘心集二十卷

朱敏濛字龍澤慶成府鎮國將軍軀幹甚偉好直言傲岸之氣人多憚之聞賊據平水敏濛出家貲盡散與貧窶及賊至被執詣李自成使跪敏濛厲聲曰我將軍也大宗之膝豈爲賊奴屈哉自成令摔下敏濛振聲一喝摔者披靡退數武羣賊蜂擁爭批其頰罵不絕口折頸裂股而死

馮運泰字來吉汾陽縣諸生豪宕自喜善屬文賊入境運泰拉同儕日夜晝守城策甚悉以上當事賊謀廣布知運泰首規拒賊方薄城即使使縛以見運泰聞之仰天嘆曰死則死耳安有昂藏丈夫而受賊刑辱哉遂投井死里人收殮如禮題其棺曰明殉節處士馮生之柩楊正春字榮初汾陽縣諸生李自成之亂賊執之去使飼馬他所正春薄暮具衣冠入文廟瞻拜痛哭隨投井是夜見夢於室人曰我得死所矣但水寒沁骨盍早出

我室人夜起而驚，備覓不得。次夜復夢曰：我在府學井中，何他求也？往視之，果得正春屍。正春死時，有丐者見之，與人言其狀。

賈守亨，字通吾，汾陽縣人。少任俠，不羈。賊氛四起，守亨偕里中好事者習射東郊。賊至境，人多謀出迎。守亨不許。及賊入其室，大罵格鬪，隨手而倒。衆賊持挺亂下，守亨給曰：汝不過欲得財耳。我有伏藏，爲汝採取。汝不得唐突以辱我。賊諾。守亨入，拔刃大叫，自剖其腹，血濺壁，腸委於地。賊隨後窺伺，大驚走。

王尚龍，字雲從，平遙縣貢生。崇正中，歷官兗州府通判。擢知陝州事。父母曲盡孝道。父文俊壽百歲，母白氏亦九十有二。

文雲鳳，介休縣人。崇正中，以材武選置近侍。李自成犯京師，懷宗崩。雲鳳趨與母訣曰：願以死報國。母曰：吾從子食祿天朝，寧再見他姓，願先死以成子志。遂自刎。雲鳳縱火焚宅舍，及妻子女同時俱死。

喬遷，介休縣諸生。太僕承詔之子也。甲申之變，賊執之，遷抗直不屈。視有井，遂投之。賊曳出，以火灼其腹，罵賊不絕聲而死。

鄭登雲，石樓縣人。見父病垂危，惶急不知所爲，遂割股。

作羹以進疾漸愈生平好施與恤窮乏值亂賊執之不屈而死

高宗文永寧州貢生官汾西縣教諭致仕歸闖賊之亂賊將田虎攻州城宗文知城陷索朝服北面望闕拜秉燭端坐賊入其家死之

張素永寧州諸生李自成之亂城陷被執不屈得脫投井死

梁國棟永寧州人性孝友流賊陷城衛父被砍四刃見父遇害罵賊求死賊曰孝子也釋之時季父及弟亦爲賊殺國棟備棺掩葬負母出城隱居奉養

賀來佐汾陽縣人八歲喪父盡哀明年母病來佐廢寢食表侍藥餌四閱月如一日及卒不食五日哀毀骨立終制後補博士弟子員

李寧平遙縣人官保定府太寧衛經歷擢耀州同知轉山東布政司理問食知州俸歷官二十年清慎如一日事母孝甘旨奉養一飯不離及歿執喪三年事死如生士大夫咸高其行祀耀州名宦

梁棟隆平遙縣貢生官華陰縣縣丞清慎有聲事繼母以孝聞

邵希曾平遙縣諸生幼孤家貧事母張氏自甘粗糲曲

盡色養。擢授。其孝屢發。果旌賞。及母歿後。歲薦入官。恨未祿養。猶時哀傷。慟泣。

趙澄。平遙縣監生。母喪廬墓。朝夕泣奠。塋中草木冬萌。有司旌表其門。

王欲見字以道。平遙縣諸生。以孝行稱於鄉。鄉人喜言其事。親居喪。可以爲法。

張榮。平遙縣人。父患疾。不能轉側。榮朝夕不離。奉侍二十餘年。未嘗處私室。父亦尋愈。有司聞而旌之。

石修玉。平遙縣人。官守備。時山賊劫掠村堡。修玉捕禦之。斬獲甚衆。羣賊圍數市。又格殺數人。死之。當事旌以

忠勇。

尙義。字用方。孝義縣人。有至性。父卒。事祖母繼母。曲盡孝誠。祖母患青盲。日夜哀禱。尋果復明。

李天育。孝義縣諸生。父以酒後狂罵鄰里。其母抑之房中。遂憤而自殺。天育痛父死非命。遂絕飲食。躄踴哀號。三日卒。督學周繼昌表其閭曰孝子。

白騰蛟。臨縣人。官薊鎮總兵官。都督簽事。力戰死。

宋銳。臨縣人。知洋縣。時藍鄙警擾。羽檄傍午。外給軍餉。內撫民心。境賴以安。

賀進。臨縣諸生。父以罪當死。進詣官求代。詞極哀切。官

憐其志繫微... 賀希孔石樓縣諸生母張氏早喪家極貧事父仲賓嘗  
從永和負米色養備至及終廬墓三年有司聞其孝行  
額旌之

甯孟魁石樓縣人事親承顏順志跬步不離父病衣不  
解帶者五十餘日及歿終喪三年獨居食粥縣人稱其  
孝行純篤

孫子文永寧州人以貢生知南和縣廉能有善政民建  
祠祀之

貢越永寧州人以貢生爲知縣祀鄉賢事實無可考

平遙縣人王茂蘭楊國洪孝義縣貢生張均臨縣諸生  
溫勵高節武衛寧鄉縣人史勉皆以孝稱其廬墓稱孝  
者孝義縣則有張大登永寧州則有貢生王爾梅寧鄉  
縣則有王伯誠貢生李士光武舉張肅諸生楊聯芳封  
股稱孝平遙縣則有梁州尹梁州儒介休縣則有王延  
孝義縣則有楊梁任國充李異香寧鄉縣則有李永

右明百六十餘人舊志列辛彥博董齡李秀賈璇田  
耕劉仲原嚴泰賈繼之劉尙義張更化劉基李鳳臯  
張偃任義李穎李願任良才任良弼溫恭霍韜李憲  
梁卞董謙武允曹輿董瑾文瑞溫廉馬驥張翼石瓚



文場武藝周備。訪車建義。張玘。楊昇。王。龐輔。劉清。劉有誠。陳讓。王友賢。高崧。四十七人。劉基。自其上世當宋時。已居青田。溫恭。霍翰。劉清。王友賢。別見仕實。董謙。別見義行。

汾州府志卷之十六

人物四

張登楷。孝義縣人。家故貧。父問智客遊。十數載。無音耗。登楷稍長。自力成家。既有子矣。一日。訣家之人曰。我將尋吾父所在。不見父。終不歸故里。輾轉經年。至川西。乃得遇其父。問智見子。雖喜不勝。然在彼地。更娶妻。生有一子。因是謂登楷曰。我家無立錫地。汝力薄。難支。俟有餘蓄。可復圖團聚。登楷度不能強。乃返。貸於族鄰。盛飾輿馬。往竟迎父。以歸。已所置產。均分與弟。其居鄉多善行。鄉人稱之曰。張孝子也。

劉昇祚汾陽人。進士官湖南道。辰州賊來攻城，昇祚設守禦甚備，出奇兵擊之，賊遁走。已而賊大至，衆數萬圍辰州。昇祚擐甲登陴，立矢石間，指麾捍禦。而辰州爲鎮，黔咽喉，故賊攻之急，數月城陷。昇祚猶大呼巷戰死。事聞，贈光祿寺卿，廕一子入監。僕溫虎亦從昇祚歿於戰。

任長慶字雲石，石樓縣人。順治二年，以拔貢生授中書。歷工部郎中，出知淮安府，轉鳳陽道，改臨洮道，卒於官。長慶精心計，有膽畧，任中書當從駕，人皆憚之。長慶毅然請行。姜瓖之亂，大兵來討，復請從行，恢復多有贊畫。在工部，權蕪湖龍江稅，以廉潔稱。所著有易解。

趙永祚，汾陽縣人。順治丙戌進士，授雷州府推官。性剛決，執法不阿。時雷民多匿山谷，學校之教不興。永祚得通文義者二百人，附於學，親爲督課。雷人始知讀書。值盜王翰肆焚掠，永祚與同知周燦詣其巢，開誠撫諭，翰投戈尋補慶陽府推官，亦以清敏著。卒後囊橐蕭然，人咸稱爲廉吏。

王廷伊，字嚴介，介休縣人。以舉人順治中知信陽州。憂歸起服，知商州，招撫流亡甚著。治績內遷兵部職方員外，轉車駕司郎中。典己酉廣西試，遷瓊州道，汰巡查檳

柳規例瓊州之以爲母憂歸卒

師佐字靖公永寧州人順治壬辰進士知福寧州揭流亡嚴差役爲文以驅虎患民立祠祀之遷蘇州府督糧同知釐漕蠹滌除漕規與糧戶約曰爾曹省一釐旁費則完一釐正供督撫兩疏薦會病卒

于清端成龍字北溟永寧州人順治十三年以副貢知羅城縣數遭兵燹後拊循殘氓稍稍相習因問地方利害悉得要領編置保甲定約束前時鄰徭歲率二三元至殺掠人畜成龍勒鄉勇將搗其巢咸懼自投不敢犯界上歸所虜掠然後民得事耕稼縣有數大姓恃徭撞

盜賊爲爪牙一逆其心則召亂成龍善撫民恩威並用數大姓皆奉法惟謹居七年遷知合州往者新歸流戶墾田旣熟土著輒爭之故旣集復散成龍爲規畫立案籍三年而後稽旬月間報歸千戶未幾遷黃州同知駐岐亭岐亭當黃麻偏界多汙湖幽壑盜所巢窟時急盜案官以盜爲諱白晝行劫不問成龍遣捕得九人集諸父老曰能保後不爲盜者貰之保二人卽諸父老前取大索連繫七賊坑之盜自是慄遁又獲大盜彭伯鈴拔置左右責以捕盜巡撫張朝珍器重成龍舉卓異會吳三桂亂作檄攝武昌事問禦亂策成龍對以安人心莫

先下令傳檄勸諭。因事疏而成龍意與之合。以故兵事皆屬成龍。諫指武昌大姓與賊交通。以藏器仗爲贖。成龍言大姓多避兵。良子湖中。家人藏兵械。備他盜。無足怪。跡之。果無所得。用卓異。遷知建寧府。朝珍奏改武昌。檄造軍所渡橋於蒲圻。賊鋒迫入城守。而橋以山水暴漲。圯罷職。會東山寇作。朝珍復委除賊。成龍曰。黃州界三省。控七十二寨。其人剽悍阻險。難猝勝。請得便宜行事。許之。問需兵幾何。成龍曰。前守蒲圻數人與俱足矣。先是妖人黃金龍亡匿劉君孚家。君孚得吳三桂劄書。與金龍潛結賊渠周鐵爪等。期七月並起。會麻城人欲因以陷其讐家。事洩。君孚恐。遂以五月反於曹家河。成龍行次陽邏。偵知君孚雖反。衆未合。遂趨白杲。未至賊寨十里。止宿。榜示脅從者。許自首免罪。誣陷者赴訴。不按捕。投訴日千人。皆宥之。賊勢孤。欲卽降。恐見誅。成龍知其情。遣一人持檄往諭。而自騎一騾。一人張蓋。一人鳴鑼前導。未至二里許。命行呼太守來救。爾山中人。君孚匿後山。夾道伏鳥鎗。弩數百人。成龍鞭騾直前。入抵賊舍。坐廳中。賊環列。黠者因相率羅拜。成龍問老奴安在。君孚嘗隸岐亭役。故呼以暱。易之。又問山中雨水禾稼。遂曰。汝等皆良民。何作賊。自取屠戮。父母妻子藏匿。

賊皆泣成說曰。賊苦須少憩。遂熟睡。移時寤。曰。客進何。乃不設酒脯。君乎。初懼見給。及是出叩頭自訴。許搗。而還如期。盡降其衆數千人。以功復官。留麻城。經畫。村野分立區保。擇謹厚者爲區長。還武昌。聞金龍逃。合紙棚河賊鄒君申。則移檄區長。徵得二千人。進駐望花山。度賊食少。彼利速戰。緩以困之。必自潰。分三路守象棋山大崎山。及布袋坳。以賊走必經黃岡。伏兵馬鞍山。嶮巖間。君申金龍糧絕。夜遁走。遇伏。盡擒。成龍坐山上受俘。疏聞。晉級。改知黃州府。江西賊犯湖口。旁掠興寧。吳三桂密布劄書。陽邏陳鼎業。今逃兵掠驛馬。永寧鄉。

何士榮石陂劉啟業。白水阪周鐵爪。鮑世庸各擁衆數千爲亂。逼趨黃州。是時各鎮援兵悉隨大軍進攻湖南。議者欲退保麻城。成龍曰。黃州爲湖北七郡門戶。我師屯荆岳者數十萬。水陸轉運。取道於此。且瀕江。控制險阻。前倚興寧廬阜。以壓天堂金剛諸寨。進祇一郡。寔東西關鍵。不可棄之。云然。徒坐困。莫若相機進剿。賊雖衆。皆取士榮進止。先破士榮。餘可不戰而下。於是徵集各區鄉勇。有衆二千人。別遣黃岡縣知縣李經政。擒鼎業。謀報士榮已據黃土坳。分衆以把總羅登雲武舉張尙聖領之。往遇賊前鋒。戰少利。成龍疾馳抵尙聖營。鄉勇

大集共得五千人營金寨下與賊對壘士榮數萬人  
自牧馬崖分東西兩路來攻東路賊少以登雲領千人  
禦之而成龍率千總李茂昇當其西尙聖攻右把總吳  
之蘭攻左戰始合之蘭中鎗死賊鬪益急成龍鞭馬徑  
前迴顧茂昇曰我死可歸報張公茂昇奮而進發矢折  
賊大旗軍隨進茂昇馬被鎗棄馬射殺二人換馬進戰  
復手刃數人而尙聖自右山繞出賊後相與合擊賊大  
敗士榮左臂斷就擒得賊名籍焚之登雲擊東路亦追  
奔數十里乘勝至呂王城據鞍草檄馳諭賊聞士榮被  
擒又知毀其名籍各解散至白水販鐵爪世庸等欲保  
什子寨成龍已先令人守隘不得上脫身走追擒之又  
分衆平石陂賊自進勦至此纔二十有四日東山亂定  
此康熙十三年冬也十五年水旱洊臻訛言復起成龍  
以人心易搖宜示以暇豫乃治赤壁亭榭與文武官寮  
飲射歌詠其間而密得暗奸流繫頓息歷官江防道福  
建按察布政使直隸巡撫江南江西總督卒年六十有  
八贈太子太保謚清端廕一子入太學其遷按察使也  
時耿精忠初平權重辟者衆獄已具成龍力言通海數  
案所牽引半皆平民遂曰於親王釋不問成龍清嚴忠  
直勤勞治事官吏無不敬畏歸於廉慎及卒將軍都統

察屬來至。襄寧。身布被一。笥中袍一。襲靴帶二事。堂後米暨鹽豉數盎而已。平時心憚成龍者。俱感動流涕。士民立祠於清涼山。

曹席珍。臨縣人。順治戊子。舉於鄉。康熙二年。知竹谿縣。自張獻忠平。毀城池。後垂二十九年。皆其餘黨盤踞。三省會勦。始經收復。然文武官之蒞竹谿者。猶各居山寨。席珍請於上官。徙入縣治事。總督張長庚可其議。於是兵民中分縣治。而居經營招徠。以縣無城池。建臺設炮。石弓矢以備不虞。居十一年。遷知彝陵州。未赴任。而吳三桂反。湖南諸郡同日告陷。鄖襄所屬沿漢江上下千

二百餘里。鎮協偏裨及士卒。聞風並起。襄鎮則楊來嘉。鄖協則洪福。竹山則謝泗。竹谿則馮元。各思投賊。甲寅三月二十五日。馮元邀席珍飲。未數巡。脫巾投地曰。時事可知矣。我輩宜乘機會。席珍正色曰。我輩當奉義守死。與此土存亡耳。明日。元遣人詐謂同心守死。當赴神盟誓。席珍知其謀。據臺不出。四月七日。元令家屬處南山。漫陰寨下。爲入川計。乃率衆攻臺。三日。凡五戰。元取薪集臺下。欲焚臺。會秦兵至。駐劄白土關。距縣四十里。元顧瞻首尾。而守備劉斌所轄士卒三百餘人。不願入川。中途劫斌還。元勢窘。遂舍去。八月十九日。賊將洪福

率五鎮十三協來攻。欲取道竹谿，窺興元及關南秦隴。席珍率衆據中峯，觀扼賊要路。令劉斌分據桐溪寨，爲犄角。賊分兵攻擊，歷四旬，大小五十五戰。賊以餉匱，萃其衆攻中峯。席珍竭力捍禦，弟曹傑從。子曹啟東及家僮張永祚、楊真、寨民陳泰、孔木匠從役徐祿、何天祚等，皆力戰死。賊將馬更奇將登觀，席珍手發大石擊之，中腦立斃。羣賊束草竿頭以焚觀樓，樓上火起，闔門遭屠。戮婦女二十餘人，相攜投崖死。席珍復上中峯絕頂，靈官廟據險以禦，不食已二日。又十餘戰，家僮四十餘人盡見殺，力盡被執。旣而得脫，走白土關，投遊擊。余位都時位都已暗與賊通，執席珍予賊。洪福送房陵，行至竹山上庸驛，題絕命辭於古廟壁。其辭曰：昆明池水橫六詔，中有長鯨尾不掉。西南風鶴過湖湘，妖氛一夜滿邊徼。我家山右尹楚水，十載楓林始量徙。全荆門戶屬西陵，未及交代軍聲起。康竹綿亘到襄樊，長漢一千二百里。偏裨鎮師與三軍，盡是八閩謫戍子。潮聲夜半捲鄖關，鳥語狐鳴滿漢南。高官大爵爭來唱，不信常山人姓顏。水冷金寒性所成，誓將隻手荅聖明。內外援絕四十日，嗟兮帳外皆楚聲。闔門義士同日死，血頸模糊當路橫。牀頭刀頭總氣盡，刻木束蒲莫問姓。任爾碎首與流



腸羞向... 國讀書萬卷取義難悠悠生死何足說系命飛報武...  
路幽繫房獄無朝暮夢魂夜到睢陽臺傷心誰復辭霧  
露臘盡冬回春到頭令下還官許釋俘共說反命偷生  
奸讀史曾笑滿武秋月黑冒險度秦關襍鹿初奔說萬  
難堪恨余逆通線索反命成仇縛送還重羅羅網再榜  
掠血肉風飛俱見骨半口鐵鈕斧合親右手筋斷右骨  
折風吹枷鎖兩做囚猙獰鬼卒互輪流上庸城外南江  
水欲葬魚腹不可求寒熒明滅照破肉啾啾如聞夜鬼  
哭雙眸開闔不能言潛將甲子算太乙兩葉天子日正  
中四海何地不呼嵩但能厲得驚霄志不怕虫尤十丈  
身及至房陵將殺之至期傳釋放安置撒海堰席珍採  
食荳花水芹等物尋賣卜於市至戊午大軍進剿賊夜  
遁席珍首謁軍門乃資送至鄖陽總督蔡毓榮檄府道  
詳驗傷痕適總督赴洞庭剿賊停止上下文移席珍僑  
居樊城辭歸籍後三院會題部議起職席珍以年逾七  
十遂不赴召

高首標永寧州人順治己亥進士知廣昌縣母憂起服  
補陵水縣丁父憂服闋補廣昌時閩籬爲亂未平其將  
劉汝桂猖獗首標單騎詣其營曉以大義汝桂心折解

甲歸降廣... 軍功例加五級尋以廉能  
行取吏部文選司主事疾卒於道旅櫬蕭然不能運會  
鄉人于成龍總制兩江乃獲歸葬。

董奕先介休縣人順治己亥進士爲平陽府教授遷國  
子監學正研先儒書以持敬爲本雜採鷺湖鹿洞條規  
分十則用訓多士所著書曰主敬編子振祖由拔貢生  
爲太谷縣教諭擢知霍山縣蒞任六載有惠政行取授  
工部屯田司主事卒於官。

梁纘素永寧州人以歲貢生知齊河縣齊河歲饑發倉  
粟哺之男女老幼田旗標識俾以次就食因爲濬趙牛  
河築王龍隄民德之改知文安文安北接西淀爲水澤  
之匯造水車數百具挹田中水外出種秔稻得米數萬  
斛又條上制府酌定旗丁圈地租法不得意爲予奪由  
是五府胥視文安例卒於官祀文安名宦。

梁潢字天水平遙縣人順治丁酉舉人知臨潁縣有善  
政行取主事歷員外郎中出知順慶府潢爲人精敏好  
讀書。

賈達汾陽縣人康熙戊午舉人官沁州學正自少有孝  
行。

靳士龍介休縣人父世愛與里人高汝才入山樵牧以

已而士龍生及長爲言父死狀而泣士龍啣指誓必報  
父讐以母在遲之康熙三十一年母歿殮葬畢乃曰復  
鬻人曰四十年積恨今日始洩遂請縣自首或欲以其  
事始末白於官士龍曰死吾願也何喋喋爲卒死於獄  
縣人哀而葬之以節貞孝烈表其墓

周琦孝義縣人康熙癸酉舉人有孝行及銓知縣以父  
老艱於迎養改授教職

梁通洛介休縣人康熙庚辰進士知濬縣作誓狀勒之  
石以時自警多善政解任後濬人爲立生祠

李棠蔭臨縣人康熙壬辰進士授內閣中書以父病歸  
養服闋改知清豐縣以廉明稱

崔鶴齡臨縣人康熙壬辰進士知興寧縣有廉操縣境  
峒獠雜處山谷間宵小易於遁跡鶴齡察知民利病編  
保甲定約束使不相擾病卒於官櫬不能歸士民感泣  
醵金爲助乃得返葬

劉而位字爾爵汾陽縣人康熙癸巳舉人知安陽縣至  
則訪民間疾苦有不便於民者務爲滌除凡訟案不使  
一夕稽留五年擢泉州府未幾簡授分守巡海興泉永

兵備道以  
茂兵備道川南永寧道疾復作卒於官其至泉州也  
屢其貪婪不職有叔父在朝爲貴官劾之無所畏避及  
病家居講學十載每揭孟子是非之心大學毋自欺爲  
言故在蜀時制府尹公以理學經濟體用兼優稱之所  
著書有省克引一卷家訓數十則及社學鄉約條規爲  
學之槩得於理趣者雖淺深但如所見要歸於躬行爲  
本

高能宣臨縣人康熙丁酉舉人知平江縣廉介善撫字  
平江疲於輸糧積欠至十餘年能宣抵任悉釋其拘繫  
鼓舞勸導夙逋一清士民頌之膺卓薦擢刑部安徽司  
主事母憂廬墓二載病篤親友勸之還家閱月卒

賀凝祚永寧州貢生官樂平縣訓導事親以孝聞祀忠  
孝祠

安之瑄平遙縣諸生有孝行雍正十三年舉孝廉縣人  
以之道限辭不應其善行多爲里黨所誦

穆生輝臨縣人由行伍官臨襄總鎮都督同知西山寇  
亂殉難廕其子授臨洮同知

梁梗永寧州人順治戊子舉人知新寧縣前此盜林亞  
祐等盤踞百峰山官兵擒斬及梗到縣上官令將亞祐

五人。第... 友祐聲相...  
防兵誤獲成獄。爲申辨。徃復十有七次。乃得釋。有海島  
五。屬縣境。值查闢田陞科。梗因民貧。僅報六百畝。巡撫  
怒。梗曰。不敢圖一己之功名。貽萬年之大害。巡撫稱善。  
又值取楠木。鄰縣以五株。費至白金六萬。梗念民貧。不  
能堪。卒請獲免。

馬得正。介休縣人。以供事與纂修議敘。判彛陵州。時吳  
三桂爲亂。州當其衝。軍需旁午。悉委籌辦。復隨軍進剿。  
凱旋。擢知銅陵縣。縣濱江。爲築大隄。數百丈。建石厝司。  
啟閉善。斷獄民服。其平允。憂歸。起服。補魚臺縣。亦水國  
也。乃浚河百餘里。以平水患。後擢知桂陽州。未赴。致仕。  
歸。魚臺祀入名宦。

張芑。介休縣人。甫二歲。父遠出。無音耗。及長。尋至江浙。  
得父柩。以歸。事母以孝。稱。母喪。哀毀骨立。築室墓傍。每  
食必奠。人咸稱之。

李克溫。平遙縣人。事父母。曲盡孝行。卒後數十年。鄉人  
言子孝。必稱克溫。

梁禹甸。字奕奕。平遙縣人。以拔貢生知長安縣。擢知河  
州。俱有仁廉稱。能自持。不事逢迎。

王元勳。臨縣人。康熙庚子鄉舉第一。後揀發廣東。權知

清饒平二縣皆有政聲又權判潮州府卒於官

王祚興永寧州人康熙丁未進士知三水縣時遭兵燹之後地荒民逃數歲無徵虧錢糧正供民因此益流亡不返祚興到縣力請蠲豁荒地逃丁屢觸上官怒終得請每歲得免地丁正額銀三千七百有奇而民困始漸蘇累擢至湖廣提學僉事士服其公明多立石紀績

呂文櫻字果初汾陽縣人康熙丙戌進士知弋陽縣又權知金谿行取監督大西倉以高安朱相國薦授戶部浙江司員外郎轉禮部儀制司郎中服闋授湖廣道監察御史尋擢通政司右叅議改授奉天府府丞以老告

歸方任弋陽時甲與乙爭婚甲貧既聘婦而乙寔先貧後富婦家再受聘妄稱乙先出其聘物爲證察之辨屬新造詰乙曰若故貧安得有此詭稱三年前某舖造也呼造者對簿纔及一月耳女遂歸甲有以田質於人代書質契者已死受田之家毀質契更爲賣契賂代書者之子証之聽治時謂曰若父書生亦爲人作此邪曰有之如某氏某田某氏某屋皆出父手因曰爾宜和其事次日具覆不能和狀而其父所書二契已取至真僞判然乃予杖而許質者贖還既署金谿有鄔某死於途身負槌痕莫可跡見鄔妻呈詞有讐殺字密訊之則云夫

出不攜一物。其妻爲督問其營，不敢言。因屏去右導之言，始述族有名歇雲者，嘗以訟啣報，疑其朋爲而無據，察情辭非妄。速歇雲至，堅不吐。既而投意一隸，俾伏聽。而遣卒佯報歇雲已成招，今解府。速辨行費，母與妻俱哭，卒卽去。姑怨婦不阻其所爲，婦以所持械在姑室中，不知何時竊去。伏者呼曰：「姑媳已承矣。」拘至案歇雲服罪。其判事務研審類如此。時縣於上官有積習，未除。文櫻羞逢迎，矜名節，適巡撫廉知文櫻爲吏良，首列薦章，格於俸淺，未合例。及入爲大司馬，復以才守力爲故。文櫻得列行取，子審韶，字學三，乾隆甲戌進士，亦

有學行，鄉人多德之。文櫻第四弟曰文樞，字用晦，康熙庚子舉人，舉孝廉方正。又舉端人正士，皆不就。呂肯堂字子建，汾陽縣諸生，性梗直，舉優行，貢入成均。而文樞亦官國子監助教，與肯堂同姓不宗，素相善。既而文樞逮獄對簿，時問者曰：「此有呂肯堂造言耳。」意欲以肯堂脫文樞。文樞直應曰：「忌者欲擠我，何可旁及。」蓋前一夕已有人導意。文樞荅言：「吾豈嫁禍於正人哉。」文樞之子審廉在家，聞父逮獄，六日走千三百餘里，奔至京師。晝夜徬徨，兩鬢月竟，感疾，口中連呼辨冤而絕，不瞑。是時事已得解，文樞哭慰之曰：「我事已白，汝何牽於心而不

顧稱語舉朝以爲名。字元清。雍正乙酉舉人。海寧陳相國悲其志。作呂孝子傳。其後文樞歸肯堂。無所合。肯歸家居講學。弟子甚衆。肯堂教人。必先端品行。然絕口不臧否人物。能詩。別無著述。而後學言人品學問。咸推服之。文樞著春秋正宗十二卷。及集古今人物曰正氣錄。劉廷翰字子藩。永寧州人。祖爾勳。歲貢生。當明之季。負母避亂。猝遇賊。以身衛母。中流矢。抱持不釋。既而創合。母子無恙。性仁孝。濟人惟恐不及。廷翰康熙辛丑進士。知政和縣。蒞任前二日。次浦城。聞廚張鋪墊。舊皆胥吏預備。而胥吏徵之里甲。爲陋規。遽禁止之。居四年。實政愛民。以賢能調福安。代者至。盤倉穀。陰令碾者碎其米。曰穀濕。計每石折閱幾二斗。廷翰不與校。然缺額盈千矣。建寧府知府疑之。親臨核實。則縣民環呼。籲求留任。太守顧謂代者曰。疇不畏新官。嗔者而戀戀舊官。乃若是。因命取穀監碾。則每石得米五斗。外且浮二三升。代者雖語塞。猶以其厥色惡。爲辭。時衆民聚觀。爭歸輦負。以易頃刻間。脫然免於累。念年逾六十。力請致仕。未一年卒於家。

賀方泰。臨縣人。雍正丁未進士。知永寧縣。治務寬厚。改代州學正。方泰四歲喪母。撫於祖母馬氏。性孝。爲童子。



劉元錫字服章永寧州人雍正丁未進士知臨邑縣歷  
壽張文登遷知德州擢知青州府改濟南病解任尋起  
權知沂州府海寧陳相國知其賢薦臺諫之職會疾作  
卒於官元錫明吏治所至有聲壽張東距會通河三十  
里而近古濟汶之會由縣境以入海而宋熙寧中黃河  
決澶州趨壽張之張澤灤明正統中決新鄉漫曹濮潰  
壽張沙灣故縣境多瀉鹵洿澤民恒苦澇治之南沙嶺  
小龍灣等七窪其下雖舊有河形歲久湮塞計民田五  
萬七千五百餘畝遇久雨輒沒水中元錫相度地勢闢  
一溝分洩導沙嶺窪之水由黃家岡出小龍灣等窪之水  
由五河口出各設牐扼其衝前此蒞壽張者或議疏濬  
卒恐有妨運道因循未敢興事至是而數萬畝民田無  
憂於淹浸文登濱海隅俗輕生婦人尤甚一歲中自戕  
者至百數十人元錫爲勸戒語俾鄉之老成人集男婦  
徧爲講說自後輕生之案遂終歲無聞及爲府時以歷  
官二十載所躬自體驗者十有五事成書一帙曰切戒  
欺飾曰隨事教化曰獎勵善良曰矜恤窮民曰禁借命  
誣告曰清釐保甲曰設立義學曰戒民輕生曰速審詞  
訟曰禁飭胥役曰詳慎初報曰矜恤獄囚曰量捐積穀

曰嚴禁... 語皆權質以告所屬州  
縣其書題曰商言謙辭也論禁借命誣告有云鬪毆殺  
傷難保必無徃徃有將平日睚眦之怨羅織詞內問官  
以事關人命不得不行拘訊到案不承嚴刑備至每多  
誣服以致沉寃莫訴卽問官明白查訊得實而初詞有  
名輾轉地累動輒經年幸留殘喘業已家傾產蕩嗣後  
如有誣捏按律反坐不宜以事出有因等語代爲開脫  
仍先將執法本意逐細示諭俾知警惕論速審詞訟有  
云如婚姻地土始必批查覆未清晰至再至三民間已  
多徃返及經準理差役傳喚不定帶到確限該役每多  
需索壓捺稟到之後問官又多停擱甫經懸牌示審臨  
時或有事故不得不行改期既審未結又復另期改審  
熒熒小民何堪輾轉守候余歷任以來票內俱令注明  
離城里數三十里限二日五十里限三日遞遠遞加另  
備手摺將簽票事由期限逐條登記置之案頭到卽審  
理十數年間並不懸牌示審如有壓捺展摺卽知期限  
有常審理無滯該差鬼蜮難施論禁飭胥役有云若輩  
外似謹愿內多奸詐誤信其貌任用不疑或與家人勾  
結內外串通竊權恣肆作奸犯科無所不至惟在吾輩  
居心清肅不爲所中事由內定毋使置喙論詳慎初報

有云入犯初報其情難掩得情一易問官每易視之命案傷械不符盜案贓夥未確之類無心細詰迨至審解供情互異初報不能更動輾轉籌畫移情就事業已大費周章或事相逕庭罪關生死何忍置生於死應死而生難爲辨白上司以事關出入不得不行駁詰再四頂詳始得定案問官以生死各當心輪得釋嗟此無辜業已備受刑楚案內無干亦受無窮拖累此皆初報不慎之故以上四事議論切深可列爲治法故刪取著於篇若其首之以戒欺飾尤接乎上下之本元錫在文登常以事傳保正某後期詰之惟俯首請罪怪其色沮問旁役則曰其家有妖魅少違禍且立至彼若言此又涉妄誕故不敢言元錫命其人以狀訴歸未具狀妖遂絕

呂曰唯汾陽縣人家貧甘旨不闕於供一事養之常咸出於至性鄉里目之曰孝子其祖母年七十有二感傷寒症不汗醫已無策曰唯禱於神卽自卧祖母被中未幾曰唯徧體皆汗祖母遂亦汗而愈曰唯以訓童子爲業而由家庭戚屬以及村黨疾苦困厄必身任之雖貧竭財力以行所當爲年四十三而卒衆論惜之

丁歲春孝義縣廩生事繼母以孝稱家貧勤學雍正五年學使按臨日命新進生童卽學使公堂再拜歲春爲

師生平讀中庸當於喜怒哀樂體認中和方見聖賢語言  
明德讀中庸當於喜怒哀樂體認中和方見聖賢語言  
於人無隔礙所論著有四書撮要周禮正編內則烈女  
傳四言訓詞等書子運升乾隆丁卯舉人

霍愚孝義縣人天性過人父母歿居喪盡禮三年之內  
每食必號泣以祭友人趙念祖將遊京師無擔石之儲  
猝舉家托愚歲餘歸妻子衣食贍足出其望外晚年家  
業已耗猶屢爲族人之貧者輸納官糧雍正八年衆議  
舉愚孝廉却不受愚美丰姿少時有豔婦誘挑之愚謹  
避有知者重其持正

賈權字爾衡汾陽縣諸生雍正中舉知宣城縣又權知  
寧國縣舊例漕米折色徵收糴於蕪湖關議價必贏餘  
目爲出洗權爲滌弊僅符時價正數民歌頌之其在宣  
城也始至卽滌免帶征解費銀三千諸陋規汰免一清  
尤善決疑案廉能之聲數月間卽噪遠邇涇縣民爭戶  
口及是百年矣至擊登聞鼓事下卷牘山積援引百餘  
人巡撫曰此非賈宣城不辦卽以委權察得其情實遂  
一言而決會行取擢主事權念父母老又無他兄弟遂  
告歸宣城故有祠祀謝元暉李太白名二賢祠民相與  
增之曰三賢肖像其中復建專祠於敬亭山

張士俊介休人。自行伍起，授保定營守備，擢遊擊，旋轉淮安漕標參將，理漕務。淮安城低下，臺堞與漕渠緣隄齊平。雍正八年，水漲不踰隄者寸許。士俊曰：「惜小費，貽大害，非計也。」隄西洪澤湖汪洋萬頃，決隄使水入湖，及勢殺而後議補苴於城漕兩利。當是時，淮民賴之，越數歲，授四川重慶總兵官，設救生船以濟瞿塘行楫。復調雲南，歷永順、昭通兩鎮。乾隆九年，以老乞休，邀恩加銜予蔭。

梁眉，孝義縣人。父可傳，樂施與。時出錢粟周里中貧乏，其死亡者助之棺衾。眉有孝行，值兵荒，負母潛逃山谷中。母卒，柩在殯，頃刻不離。苦次，知縣陳之文額表可傳。曰：「義士表眉曰孝子，眉子佩亦端方恪謹。」知縣閔衍額表之曰：「德行可傳，眉佩並諸生。」

李昱，寧鄉縣貢生。有孝行，父歿，事繼母，撫稚弟，誠篤備至。里黨中言孝友，必稱道昱。昆弟同居數十年，昱歿後，弟乃析產，多自予，兼數倍。人見昱之子時時不給，慮多。昱之賢，同縣人劉有德與弟有才家貧，以傭工供旦夕。兄弟俱天性過人，母瞽，盡孝養。鄉人稱之。知縣呂履恒聞其貧而能孝，時給以錢粟。

宋元址，字定中，汾陽縣人。以歲貢生官和順縣訓導。元

址性孝友少失怙養繼母由盡子職生平雖無所見於世子弟後學咸以其內行修也奉之爲師法良有司至是者亦樂表其善行以爲多士勸子銜王子舉於鄉亦以孝稱

郝之芳字炳青汾陽縣人歷官壺關縣訓導知山東之肥城縣江西之瑞昌縣遷太常寺博士改中書科中書陞見日以同知用發往江南權知江陰縣事數月因病告歸其居官有廉操多惠政自少失父事繼母以孝聞與弟之荃之芬友愛極篤兩弟亦念兄居官清正常輦家貲所有至衙署以佐祿入不及蒞肥城時值歲饑奉交賑貸不少假手胥吏務於民實有濟及至瑞昌捐俸創設義學又於忠孝節義祠旁建講堂課勵其秀民得以造就者多人共呼爲郝公講堂

曹曰英字彥傑汾陽人少孤事母孝爲諸生有聲譽家素饒能推恩族黨賴以舉火者衆有張媪者於母爲中表姊妹嫠老無所依養之終其身居鄉務退讓子學會偶與老農語言不相下親詣昨舍謝失教不問曲直也縣境舊食附近土鹽惟行河東之引而不食其鹽惟輸稅於官謂之鹽稅所輸之價昂不便民且巡役肆行窮簷愁怨或至誣告以販其害不可究詰曰英與

衆詣官白狀卒得請均其稅於糧而廢商民以不擾蓋  
居恆悛悛而遇所當爲未嘗懼懦有如此曰英與同縣  
王敏友善敏極狷潔衆共呼之曰王廉士惟曰英餽粟  
遺布敏無所違却人或效曰英之爲輒復不見納曰英  
生平重然諾與人交有始終卒年五十有一乾隆辛巳  
以第三子學閔官檢討 覃恩勅贈如其官階  
胡侃字介峰汾陽縣諸生遠近咸呼爲胡孝子父宗堯  
官馬邑縣教諭憂歸旣而病累年侃侍養盡孝道鄉人  
咸爲之感動故以孝子之名歸焉侃聞愈益自責父歿  
後適 朝廷有保舉例知其行者欲起之侃以母老辭  
卒不就

任錫嘏石樓縣諸生事母孝母癱病十餘年侍養不離  
側乾隆元年學使聞而表之

冀晏平遙縣人性孝誠祖母癱病卧不能動移者踰三  
年晏晝夜侍養飲食必親進生母侯氏得蠱證醫家言  
蠱之屬名血蠱者以口吸去膿血得愈晏卽親吸之而  
母病果除縣中以孝行聞者鄧良輔鄧石長郭文煥任  
憲章趙榮秀郝振都喬壯觀冀良壁冀州燮喬法舜皆  
能誠篤不失子職

段珂字佩斯汾陽人乾隆己未進士知浦城縣值歲饑

力請得賑恤又多方爲全活饑民計民賴以生尋丁母憂歸泣送者不絕於途

李錫嘏字如九臨縣人乾隆乙丑進士歷知陽武祀二縣始至陽武值水災親視民間疾苦請帑給賑其年冬復捐俸及勸富民輸粟煮賑民賴以不至失所祀歲饑錫嘏盡心安集奉文賑恤亦如陽武以堪勝知府保舉尋權知衛輝既而同知開封督漕卒於途次其居官勤民事多惠政祀人立生祠於西郊外

何其慧永寧州拔貢生性孝友事母曲盡子道以朝考第一知鹽山縣

王玉書永寧州人有孝行乾隆十五年父病醫藥不效將危玉書請於父問思食何物父曰惟思桑木耳正值隆冬此物萬無生理玉書泣禱於神卧桑樹下竟寐久之及覺仰見樹則木耳新生色甚鮮取以進父病頓愈鄉人奇其事知州李廷秘聞之額表其門曰孝續臨沂張廷藩介休縣人有孝行居喪廬墓三年後官朔平府訓導乾隆二十三年以孝子旌祀鄉賢而右玉縣訓導郭恒鏞生員石汝璋田馨美生員梁浩弓斯張孟培烈董居中生員張國璞皆以孝行稱監生宋如隱齊東縣知縣梁洲定州同知張正任亦以廬墓稱孝



張呈績介休縣監生七歲失父事母孝母嘗病思乳泉  
泉在山險中往汲遇虎虎廼視之徐去人以為孝誠所  
感及母喪廬墓三年乾隆三十四年知縣王謀文為請  
旌

